

Utkast

Forskrift om vern av Herdla naturreservat i Askøy og Alver kommunar, Vestland fylke

Fastsett ved kgl. res. xx.xx.202x i medhald av lov 19. juni 2009 nr. 100 om forvaltning av naturens mangfold (naturmangfoldloven), § 34 og § 62. Fremja av Klima- og miljødepartementet.

§ 1 Føremål

Føremålet med forskrifta er å ta vare på våtmarksområde og marine grunnvassområde som har særskilt betydning for biologisk mangfald. Det skal takast vare på trua natur og verdfulle geologiske førekomstar.

Dei spesielle landformane og dei enorme lausmasseavsetningane frå siste istid legg grunnlag for eit rikt og variert fugleliv med fleire trua og sårbare fugleartar. Området er viktig både som hekkelokalitet, rasteområde i trekktida og som overvintringsområde. Område med viktig næringssøks- og hekkefunksjon, både på land og i grunnvassområda, må gis eit særskilt skydd. For grunnvassområda gjeld dette både botn, vassøyle og vassoverflate. Det finst og trua naturtypar i området.

Det er ei målsetting å ta vare på og utvikle verneverdiane vidare.

§ 2 Geografisk avgrensing

Naturreservatet omfattar følgjande gnr./bnr.: Askøy kommune: 42/1, 42/4, 42/49, 42/77, 42/103, 42/104, 42/105, 42/119, 42/120. Alver kommune: 355/63 (Ringholmen).

Naturreservatet dekker eit areal på om lag 5,14 km², der 3,85 km² er sjøareal.

Vernegrensene for naturreservatet går fram av kart datert Klima- og miljødepartementet xx.xx.xxxx. Dei nøyaktige grensene for naturreservatet skal merkast i terrenget. Knekkpunkta skal koordinatfestast.

Verneforskrifta med kart blir oppbevart i Askøy og Alver kommunar, hos Statsforvaltaren i Vestland, i Miljødirektoratet og i Klima- og miljødepartementet.

§ 3 Vernereglar

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a) Vegetasjonen, medrekna daude buskar og tre er verna mot skade og øydelegging. Det er forbode å fjerne plantar og sopp inkludert lav eller delar av desse frå naturreservatet. Planting eller såing av tre og annan vegetasjon er forbode.
- b) Dyreliv, medrekna reirplassar og hiområde, er verna mot skade, øydelegging og unødige forstyrring. Utsetting av dyr er forbode.
- c) Det er forbode med hund i reservatet.
- d) Det må ikkje setjast i verk tiltak som kan endre naturmiljøet, til dømes oppføring av bygningar, anlegg og faste innretningar, akvakultur, havbeite, opplag av båt, campingvogner

og liknande, framføring av luftleidningar, jordkablar og kloakkleidningar, bygging av vegar, drenering og andre formar for tørrlegging, uttak og lagring av masse, ny utføring av kloakk og annan konsentrert tilførsle av ureining og etterlating av avfall. Opplistinga er ikkje uttømmmande.

- e) Bruk av naturreservatet til større arrangement er forbode.
- f) Bruk av dronar, undervassdronar, modellfly, dragar og liknande er forbode i heile verneområdet.
- g) Jakt, fangst og bruk av skytevåpen og fiske med garn og ruse er forbode.
- h) Camping, oppsetting av telt og kamuflasjeinnretningar, bålbrekking og bruk av eingongsgrill er forbode.

§ 4 Generelle unntak frå vernereglane

Vernereglane i § 3 andre ledd er ikkje til hinder for:

- a) Sanking av bær, nøtter og matsopp.
- b) Beiting.
- c) Drift av eksisterande jordbruksareal på innmark, medrekna gjødsling, bruk av sprøytemiddel og vedlikehald av grøfter, og oppføring av gjerder i samband med jordbruket.
- d) Drift av kystlynghei på øyer og holmar, medrekna beiting og brekking.
- e) Militær aktivitet i sjøforsvaret si forbodssone på Herdlefaket og øvingar og aktivitet i skyte og øvingsfelt V-12 i Hjeltefjorden.
- f) Vedlikehald av eksisterande bygningar, vegar, stiar, gjerder, anlegg og innretningar.
- g) Fjerning av vegetasjon som ikkje er stadeigen.
- h) Drift og vedlikehald av eksisterande sjømerke og andre navigasjonsinstallasjonar.
- i) Drift og vedlikehald av eksisterande sjøkablar og naudsynte reparasjonar ved akutt utfall.
- j) Kiting og vindsurfing i område der det ikkje er ferdsleforbod.

§ 5 Regulering av ferdsel

All ferdsel skal skje varsamt og ta omsyn til vegetasjon, dyreliv og kulturminne. I naturreservatet gjeld følgjande reglar om ferdsel:

- a) Motorisert ferdsle til lands, inkludert landing og start med luftfartøy, er forbode.
- b) Flyging lågare enn 300 m over verneområdet er forbode.
- c) Sykling, riding og bruk av hest er forbode.
- d) Av omsyn til fuglelivet skal ferdsle gjennom innmark (på Herdlevaen) skje etter trasear som er avmerkt på vernekartet og vist på skilt.
- e) I følgjande område merkt på vernekartet er all ferdsle, herunder padling, kiting og vindsurfing, forbode heile året.
 - a. Eit område på land i området Prestvika-Urdneset. Området er merkt med A i vernekartet.
 - b. Eit område på vatn – Herdlaflaket. Området er merkt med B i kartet.
 - c. Eit område på vatn mellom Herdlevaen og Lamøy. Området er merkt med C i vernekartet.

§ 6 Generelle unntak frå ferdselsreglane

Ferdselsreglane § 5 er ikkje til hinder for gjennomføring av militær operativ verksemd og tiltak knytt til ambulanse-, politi-, brannvern-, rednings- og oppsynsverksemd, samt gjennomføring av skjøtsels og forvaltingsoppgåver som er bestemt av forvaltingsstyresmakta. Unntaket gjeld ikkje øvingskjøring.

Ferdselsreglane i § 5 andre ledd er ikkje til hinder for:

- a) Naudsynt motorisert ferdsle knytt til jordbruksdrift jf. § 4 b, c og d, medrekna tilkomst med båt til Lamøy.
- b) Sykling, også med elektrisk sykkel, på vegen frå inngangen til reservatet i sør til Paddehola, vist på vernekartet.
- c) Naudsynt tilkomst med båt, medrekna motorbåt, til hytte på Lamøy.
- d) Naudsynt ferdsel, medrekna motorferdsel, knytt til aktivitetar nemnt i § 4 punkt h og i.

§ 7 Spesifiserte dispensasjonsreglar

Forvaltningsmyndigheten kan etter søknad gi dispensasjon til:

- a) Felling av vilt som kan skade verneverdiane.
- b) Skadefelling av vilt i samsvar med gjeldande regelverk. Løynet må ikkje føre til vesentleg skade på verneverdiane.
- c) Oppføring av naudsynte navigasjonsinstallasjonar og andre farleistiltak for å trygge ferdsle til sjøs.
- d) Naudsynt motorferdsel knytt til aktivitetar nemnt i § 4 punkt e, f og g og § 7 punkt c.
- e) Vedlikehald og istandsetting av eksisterande kulturminne.
- f) Bruk av drone i samband med landbruksverksemd, forvalting og oppsyn med området.
- g) Ferdsle og tiltak i samband med forskning, undervisning og overvaking.

§ 8 Generelle dispensasjonsreglar

Forvaltingsstyresmakta kan gjere unntak frå forskrifta dersom det ikkje strir mot verneformålet og ikkje kan påverke verneverdiane nemneverdig, eller dersom tryggleikssyn eller omsynet til vesentlege samfunnsinteresser gjer det nødvendig, jf. naturmangfoldloven § 48.

§ 9 Skjøtsel

Forvaltingsstyresmakta, eller den forvaltingsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstand som er formålet med vernet, jf. naturmangfoldloven § 47.

§ 10 Forvaltingsplan

Det kan utarbeidast forvaltingsplan med nærare retningslinjer for forvalting av naturreservatet. Forvaltingsplanen kan innehalde nærare retningslinjer for gjennomføring av skjøtsel.

§ 11 Forvaltingsstyresmakt

Miljødirektoratet fastset kven som er forvaltingsmynde etter denne forskrifta. Miljødirektoratet kan delegere styresmakta til kommunar som samtykker til det.

§ 12 Ikraftsetjing

Denne forskrifta trer i kraft straks. Samtidig blir forskrift 28. juni 1985 nr. 1357 om fredning for Herdla naturreservat med tilliggende fuglelivsfredning, Askøy og Meland kommuner, Hordaland oppheva.

Bergen, 11.06.2025. Statsforvaltaren i Vestland

Soner med ferdsleforbod:

